

Evening Dogri News Bulletin, 31 January 2025

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. राष्ट्रपति द्रौपदी मुर्मू होरें आखेआ ऐ जे दफा 370 हटने दे बाद जम्मू-कश्मीर च हालात बड़े मते बदले न। उनें आखेआ जे कश्मीर गी रेल राहें देसै दे होरनें हिस्से कन्ने जोड़ना मजूदा सरकार दी इक बड़ी उपलब्धि ऐ।
2. प्रधानमंत्री नरेन्द्र मोदी होरें आखेआ ऐ जे संसद दा बजट इजलास, 2047 तगर विकसित भारत दे निर्माण लेई नमें विश्वास ते उर्जा दा संचार करोग।
3. लेफ्टिनेंट गवर्नर मनोज सिन्हा होरें आखेआ ऐ जे इक बेहतर दुनिया ते जम्मू-कश्मीर लेई सनेही कल दे निर्माण लेई युवा गै स्टाड़ा भविष्य ते मेद बी हैन।
4. पुंछ जिले च कब्ज़ा रेखा कश सुरक्षाबलें द'ऊं आतंकवादिएं दा सफाया करदे होई घुसपैठ दी कोशश गी नाकाम बनाया ऐ।
5. महिलाएं दे अंडर-19 टी20 क्रिकेट विश्व कप दे सेमीफाइनल च भारत नै इंग्लैंड गी 9 विकेटें कन्ने हराइयें फाइनल च अपनी थाह पक्की करी लैती ऐ।

<><><><><><>

President-Address

राष्ट्रपति द्रौपदी मुर्मू होरें आखेआ ऐ जे दफा 370 हटाए जाने दे बाद जम्मू-कश्मीर च हालात बड़े मते बदली गेन। उनें तौलें गै कश्मीर लेई शुरू होने आहली रेल सेवा गी सरकार दी इक्क बड़ी उपलब्धि करार दिता ऐ। इस बरे दे बजट इजलास दी शुरूआत दे मौके पर अज्ज संसद दी सांझी बैठक गी संबोधित करदे होई राष्ट्रपति होरें आखेआ ऐ उधमपुर-श्रीनगर-बारामूला रेल लिंक परियोजना दा कम्म सबूरा करी लैता गेदा ऐ ते हून कश्मीर गी रेल लाइन दे राहें कन्या कुमारी कन्ने जोड़ी दिता जाग। राष्ट्रपति होरें आखेआ जे सरकार देसै दे विकास ते लोकें दे कल्याण लेई तेज रफ्तार कन्ने कम्म करा 'रदी ऐ। संसद दे सांझे इजलास गी संबोधित करदे होई राष्ट्रपति मुर्मू होरें आखेआ जे

देसै दे नौजवान स्टार्ट अप्स कोला लेइयै खेइहें ते खेइहें थमां लेइयै अंतरिक्ष तक्कर दे खेतरें च अज्ज भारत दा नाऽ रौशन करा करदे न। उनें आखेआ जे भारत आर्टिफिशल इंटेलीजेंस ते तकनीकें गी अपनाने दे खेतरें च दुनिया गी बत दस्सा करदा ऐ। उनें आखेआ जे अज्ज खरी मती गिनतरी च महिलां लड़ाकू जहाज डोआ करदियां न, पुलस बलें च शामिल होआ करदियां न ते केई बड्डे कापॉरिट घरानें दी अगुवाई करा करदियां न ते एह सब किश संसद लेई बड़े गै मानै आहली गल्ल ऐ।

<><><><><><>

PM Budget (Byte)

एहदे शा पैहले संसद दे बजट इजलास दे शुरू होने शा प्रधानमंत्री नरेंद्र मोदी होरें मीडिया कर्मियें गी संबोधित कीता ते इक्क लोकतांत्रिक राष्ट्र दे तौर पर भारत दे 75 बरे पूरे होने पर गर्व जताया ते आलमी सतह पर भारत दी मजबूत स्थिति पर बी लौऽ पाई। श्री मोदी होरें एह विश्वास जाहिर कीता जे संसद दा बजट इजलास 2047 तक्कर विकसित भारत दा लक्ष्य हासिल करने च नमें विश्वास ते उर्जा दा संचार करोग। इस मौके उनें आखेआ।

<><><><><><>

LG

लेफ्टिनेंट गवर्नर मनोज सिन्हा होरें अज्ज आखेआ जे इक्क बेहतर दुनिया दे कन्नोकन्नी जम्मू-कश्मीर दे सनैहरी कल आस्तै नौजवान स्हाड़ा भविक्ख ते मेद बी ऐन। आकाशवाणी जम्मू दे संवाददाता मूजब एल.जी होरें आखेआ ऐ जे स्हाड़ी प्राचीन सभ्यता कन्नै जुड़े दे विचारें गी अग्गे बदाने ते इक्क मजबूत जम्मू-कश्मीर दे निर्माण लेई नौजवानें पर बड़ी बड्डी जिम्मेदारी ऐ। एल.जी होर नमीं दिल्ली च गणतंत्र दिवस आहले कैप च हिस्सा लैने मगरा परतोए दे एनसीसी कैडटें कन्नै गल्ल करा रदे हे। इनें कैडटें गणतंत्र दिवस कैप दे अपने तजुर्बे सांझे कीते। श्री सिन्हा होरें इनें कैडटें ते एनसीसी अधिकारिणें दे शानदार प्रदर्शन लेई उंदी सराहना कीती।

<><><><><><>

Economic-Survey

माली बरे 2025 च भारत दे अस्सल सकल घरेलू उत्पाद च 6 अशारिया 4 फीसद दा बाददा होने दा अनुमान ऐ ते माली बरे 2026 च एह बाददा 6 अशारिया 3 थवां 6 अशारिया 8 फीसद बशकार रौहने दी मेद ऐ। अज्ज संसद दे दौनें सदनें च वित्त मंत्री निर्मला सीतारमण हुंदे आसेआ पेश कीते गेदे आर्थिक सर्वेक्षण च एह अनुमान लाया गेआ। आर्थिक सर्वेक्षण च इस गल्ला पर लौस पाई गई ऐ जे 2011-12 च स्थिर कीमतें पर देसै दी जीडीपी माली बरे 2025 दी पैहली तिमाही च 6 इशारिया 7 फीसद ते दुई तिमाही च 5 इशारिया 4 फीसद बदी ऐ। एहदा मतलब एह ऐ जे मौजूदा माली बरे दी पैहली छमाही च अस्सल जीडीपी बाददा 6 फीसद होग। माली बरे 2025 बरे दी पैहली छिमाही च कृषि विकास स्थिर रेआ जदके दुई तिमाही च त्रै इशारिया 5 फीसद दी विकास दर दर्ज कीती गई। माली बरे 2025 दी पैहली छमाही च उद्योगिक खेतर च 6 फीसद दा बाददा होआ ते पैहली तिमाही च 8 इशारिया 3 फीसद दा मजबूत बाददा दिक्खेआ गेआ। सेवा सरबन्धी खेतर माली बरे 2025 दी पैहली छिमाही च 7 इशारिया 1 फीसद दे बाददे कन्नै खरा प्रदर्शन जारी रक्खोग। माली बरे 2025 दी चौथे तिमाही च खाने-पीने आहिलियें चीजें सरबन्धी महंगाई च नर्मी औने दी मेद ऐ। रोजगार दे सरबन्धे च सर्वेक्षण च आखेआ गेआ ऐ जे 2023-24 दी सालाना श्रम बल सर्वेक्षण रिपोर्ट मूजब 15 बरे ते औहदे शा बदद दी उम्मी दे लोकें आस्तै बेरोजगारी दर 2017-18 च 6 फीसद थमां लगातार घटियै 2023-24 च 3 इशारिया 2 फीसद होई गई ऐ।

<><><><><><><>

CS-Basant panchmi

मुख्य सचिव अटल डुल्लू होरें मथवार दे बाबा बल्लो देवस्थान पर 3 दिनें दे बसंत पंचमी मेले दा उद्घाटन कीता जित्थे बड़ी मती गिनतरी च श्रद्धालुएं मत्था टेकियै शांति ते खुशहाली लेई प्रार्थना कीती। कार्यक्रम च बोलदे होई मुख्य सचिव अटल डुल्लू होरें नेह मेले दी महत्ता पर लोह पाई ते आखेआ जे इयै नेह मेले कन्नै परम्पराएं गी बचाने ते लोकें च आपसी भाईचारे गी मजबूत करने च योगदान दिंदे न। मेले च कई सारी गतिविधियें दा आयोजन कीता गेदा ऐ जेदे च सांस्कृतिक प्रदर्शनियां, भजन-कीर्तन ते खाने-पीने आहली बवस्था लेई लंगर बी शामिल ऐ। मकामी अधिकारियें इस मेले गी

बवस्थित ढंगे सिर चलाने लेई खास इंतजाम कीते न। इस मौके पर आकाशवाणी समाचार कन्नै गल्ल करदे होई सामाजिक कार्यकर्ता जोरावर सिंह होरें आखेआ।

<><><><><><><><>

Terrorist-Killed

पुंछ जिले च कब्जा रेखा कश होए दे टाकरे च सुरक्षाबलें द'ऊं आतंकवादियें गी मारी मकाया ऐ। आकाशवाणी दे जम्मू संवाददाता दी रिपोर्ट मूजब फौज दे सौगी जवानें जंदे रोज पुंछ जिले दे गुलपुर सेक्टर च खड़ी करमाड़ा इलाके च कब्जा रेखा दे नेड़े भारी हथियारें कन्नै लैस आतंकवादियें दी घुसपैठ दी कोशिश गी नाकाम कीता हा। इस दौरान होई दी गोलीबारी च 2 आतंकवादी मारे गे। इलाके दी तपाशी दौरान उत्थुआं बड़ी भारी मात्रा च हथियार असलाह ते होर दुआ जंगी समेयान बरामद होआ। तोआई, सुरक्षाबलें डोडा जिले च आतंकवादियें दी संदिग्ध नक्लोहरकत बारै जानकारी थोने परैंत कल उत्थे घेराबंदी ते तपाशी अभियान चलाया। जम्मू-कश्मीर पुलस ते सी.आर.पी.एफ आसेआ भद्रवाह च डोरू, बस्ती ते आले-दोआले दे होरने जंगली इलाकें च सांझे तौरा पर एह तपाशी अभियान चलाया गेआ।

<><><><><><><><>

Organic-Farming

जैविक खेतीबाड़ी गी बढ़ावा देने दे मकसद कन्नै गंगू चक्क पंचैत दियां बसनीक सुष्मा देवी होरें इसी अपनाइयै इक मिसाल कायम कीती ऐ। उंदा मनना ऐ जे रसायन मुक्त राई-बाई कन्नै मिट्टी दी गुणवत्ता च सुधार हुंदा ऐ ते फसलें गी जरूरी पोषण थोने च बी बाददा हुंदा ऐ। अपने साथी करसानें गी जैविक खेतीबाड़ी अपनाने लेई प्रोत्साहित करदे होई जैविक तकनीकें दा लाह ठोआंदे होई कीटनाशकें पर निर्भरता घट्ट करने लेई सलाह दिती ऐ। अपने जत्तें राहें उर्ने फसल दी बेहतर गुणवत्ता च बाददा हुंदे दिक्खेआ ऐ। उंती सफलता दी कहानी इस खिते दे मते सारे करसानें गी प्रेरित करा रदी ऐ। आकाशवाणी समाचार कन्नै गल्ल करदे होई सुष्मा देवी होरें आखेआ।

<><><><><><><><>

Udh. Bamboo Workshop

मकामी कारीगरें दे हुनर गी दर्शाने दे मकसद कन्नै उधमपुर च दस्तकारी मैहकमे आसेआ इक बांस सरबन्धी वर्कशॉप दा आयोजन कीता गेआ। इस वर्कशॉप दा सरिस्ता राश्ट्रीय बांस मिशन दे दस्तकारी ते हथखण्डी प्रदर्शनी तैहत कीता गेदा हा जेदा उद्घाटन उधमपुर वेस्ट दे एमएलए पवन गुप्ता होरें कीता। इस मौके पर मैहकमे दे डरैक्टर सूरज प्रकाश होर बी उत्थे मौजूद हे। इस प्रदर्शनी च बांस कन्नै बनाए गेदे उत्पाद, सोजनी कढ़ाई ते होरनें परम्परागत दस्तकारी आहले उत्पादें दे स्टाल लाए गेदे हे जेहड़े खित्ते दी सगोसार संस्कृति ते विरासत गी दर्शादे न। इस मौके पर बोलदे होई उधमपुर वेस्ट थमां एमएलए पवन गुप्ता होरें आखेआ।

तोआई, किट्ठ गी संबोधित करदे होई इस मौके पर दस्तकारी ते हथखण्डी मैहकमे दे निदेशक सूरज प्रकाश रकवाल होरें आखेआ।

<><><><><><>

U-19 T-20 World Cup

आई.सी.सी अंडर-19 महिलाएं दे टी-20 क्रिकेट विश्व कप च पिछली बार दी जेतू भारतीय टीम नै कुआलालंपुर च खेड़े गेदे दुए सेमीफाइनल च इंग्लैंड गी 9 विकटें कन्नै हराइयै फाइनल च अपनी थाहर पक्की करी लैती ऐ। ऐतवारें खिताबी मुकाबले च भारत दा मुकाबला दक्खन अफ्रीका कन्नै होग। अज्जै दे मैच च इंग्लैंड आसेआ दित्ते गेदे 114 रन्जें दे लक्ष्ये दा पिच्छा करदे होई भारती टीम नै 15 ओवरें च 1 विकट दे नुकसान पर 117 रन्ज बनाई जित्त अपने नां कीती।

<><><><><><>

Cricket

भारत ते इंग्लैंड बश्कार 5 मेचें दी श्रृंखला आहला चौथा टी-20 अंतरराष्ट्रीय क्रिकेट मैच अज्ज संझा पुणे दे महाराष्ट्र क्रिकेट एसोसिएशन स्टेडियम च खेड्ढेआ जाग। मैच संझा 7 बजे शुरू होग। त्रीये टी-20 अंतरराष्ट्रीय मैच च इंग्लैंड नै भारत गी 26एं रन्जें कन्नै हराई दिता हा। इस हार दे बावजूद बी सूर्य कुमार यादव ह्दी अगुवाई आहली भारती टीम 2-1 कन्नै अगगे ऐ।

<><><><><><>